

## Reng Mikalugurang

### Tomarind at Datu Nebuchebeba


**B**ayu la pa dinatang deng Kastila keti Pilipinas, deng kayarian pamuntukan da la reng datu. Metung kareti pamuntukan neng Datu Nebuchebeba. Melawak ya ing keyang sasakupan uli na ning saup nang Tomarind a metung nang budning tawan.

Misan a aldo, lisuban de ing karelang kayarian ding aliwang tribu. Aligtas neng Tomarind i Datu Nebuchebeba. Manibat kanita, mekayan ya lub ing Datu kang Tomarind.

Miras ing panaun na mesubuk ing karelang pamikaluguran. Milsinta la king metung a malagung prinsesang ibat king malaut a kayarian. Mikasundu lang agnan dang sabyan ing sinta ra keng prinsesa. Apikayari dang tanggapan da nung ninu man ing apili na.

Dinatang ing aldo ning pamiyarap king prinsesa. Taneng atin ya palang aliwang balak ing tata ning prinsesa.





Mika pamanyubuk. Ing manyambut, iya ing pakasal king prinsesa.

Ing mumunang kapagsubukan: pamanintun king mawagáng batu ibat king kweba king kapitung bunduk. Oneng, bayu ka milub king kweba ating magbanteng adwang ganid a mamangan tau. Dakal nala deng sinubuk lungub king kweba dapot alang menagumpe. Balu da ri Datu Nebuchebeba at Tomarind ing peligru anya lepitan de ing ermitanyung Tipuca. Atin yang binie kareng adwa at keyang sinabi, "Dalan ye ing malam a tukud at ipaspas ye kareng ganid."

Matapang dalang erapan deng ganid. Oneng, kabang makilaban la, atabili neng Datu Nebuchebeba ing tukud. Matba yang laklakan na ne sa' ning metung a ganid anyang agad neng asamsam Tomarind ing tukud. Apaspas nekeng ganid ing tukud. Metunud la reng ganid at binie de ing mawlang batu ning kweba kang Tomarind. Inampang neng Tomarind ing mawlang batu king tatang na ning prinsesa.

Ing kadwang kapagsubukan: mangulkul a malamal a balun bang makakwa lang malinis





a danum ding memalen. Pasibayu, entabayanan na nalang ermitanyung Tipuca. Dininan na lang malam a palâ. A lub na nang Datu Nebuchebe ing makabawi ya keng mumunang pangasambut na. Maranun pa, inumpisan na ná ing pamangulkul. Uling bisa yang muna, e na amalayan na melagsak ne pala ing gabung makapadurut king kulkul. Dimdam nang Tomarind ing gulisak ning Datu. Memiragli ya i Tomarind. Ginulyut ne ing Datu keng kulkul at aligtas neng pasibayu iti.

Bilang kapasalamatan, pepaubaya na neng Datu Nebuchebe ing prinsesa kang Tomarind. mikasal la di Tomarind ampo ing prinsesa.

Anyang meangu ne bie ing tatang na ning prinsesa, masalese neng pemuntukang Tomarind ing kayarian. Menatili lang mikálugúran di Datu Nebuchebe at Tomarind. Meging payapa la reng aduang kayarian.